



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym


ig tiryimym@aolima

yt tir yimym

TAPAK 8

Ukraine-i Russia ket nungi par  
litsü sq km 37 meyipa agiogo

Liverpool-i euro million 70 agi  
Dominik Szoboszlai alizükogo



VOL. XX NO. 261 (ADOK 261) DIMAPUR SANGTENNÜ (TUESDAY)

CHITENI (JULY) 04, 2023

₹ 5.00

## Japukong Senso Senden-i NFHRCC pusemer

**Dimapur, July 3, 2023 (TYO):** Japukong Senso Senden-i Nagaland Foothill Road Co-ordination Committee (NFHRCC) pusema state sorkar dang Foothill Road Project tekara nung inyaktüsü tayongzükba agütsüogo.

State sorkari bangjemtepa aliba ama iba mapatong ya NEC programme kübok inyaktüsü ta JSS-i sangdong ka nung ashi.

Nagaland state ngur küm 50 süüaka foothill road mali aser iba ajanga arrotsülen alirtemi timtem kanga ajurur. Iba lenmang ajanga Nagaland state atema senotsü bentsür arutsü aser rongsenketzüing

ajungkettsü, ta JSS Tir Imdongtangba aser Tongti Tezülur Toshisangba nati sangdong nung shia lir.

Tanü Naga nunger yimdaklirtem indang Tea Garden, Areca Nut, Sandalwood, Coffee, Cardamom, King Chilly amala alu yima lir aser jilatemi Horticulture aser Agri products bener yokteter, ta JSS-isa ashi.

Anungji Nagaland sorkari iba lenmang atema temulung agütsüsü mepishir kechiyong iba ajanga nübortem lenmang aisü nung tajangzük angutsü, ta parnokisa metetdaksü.

## Nagaland CM-i anir Cabinet Minister tem New Delhi-i ogo

**Dimapur, July 3, 2023 (Dimapur):** Nagaland sorkari Union Home Minister Amit Shah aser interlocutor AK Mishra na den ajuruteptsü atema New Delhi-i ogo.

Chief Minister Neiphu Rio-i anir cabinet minister 7, Chief Secretary aser Home Commissioner nunger Delhi tongogo.

CM Rio-i anir cabinet Minister kari Mongulbarnep yakta interlocutor AK Mishra den ajuruteptsü aser iba sülen

nikongdang parnoki Amit Shah den ajuruteptsü.

Centre-i ENPO dang autonomous council tentettsü ashiba atema Nagaland sorkari June 30 nü consultative meeting ka jatepa athiba sülen parnok New Delhi-i ogo.

Iba mapang Rio aser par cabinet züngsemtemi Home Minister Amit Shah den Eastern Nagaland Peoples Organisation (ENPO) takhangba aser Uniform Civil Code (UCC) benoka lemsateptsü.

June 28 nü Nagaland cabinet senden nung Centre aser ENPO den jembiteptsü Frontier Naga Territory (FNT) mesüra Autonomous Council nungja atema ratatepba indang jembitsü lemtet.

Külen, ENPO-ia Dimapur nung Eastern Sumi Hoho (ESH) den senden ka amentsü jaoka lir.

June 29 nü ESH-i sentong ka agi aser Chief Minister Neiphu Rio dang parnok Nagaland nung dang adentsü indang memorandum ka agüja liasü.

## Manipur nung 'President's Rule' benoktsüla: RRAG

**Guwahati, July 3, 2023 (Agencies):** Centre-i Manipur state sorkar anentsütsüla aser Constitution of India indang Arlla 356 kübok President's Rule benoktsüla ta Rights & Risks Analysis Group (RRAG)-i Hombarnü metetdaksüogo.

RRAG ya Delhi nung amenoker inyakba think tank group ka lir aser parnoki Centre sorkar ajanga Manipur tensa maziüoktetba metetdaksüogo.

May 3 nungi Manipur nung Meitei aser Kuki kintem tsüingda rara adok aser iba ya Meitei nunger nem Schedule Tribe (ST) jenjang agütsüsüba ken o ajanga adokba liasü.

Union Home Minister Amit Shah-i May 29 nungi June 2 tashi Manipur nung mongzüker telok balala den jembitepaka tensa kasa dang lir ta RRAG-i ashi.

"Tang Manipur nung Chief Minister Biren Singh-i lendenlen aser Ministry of Home Affairs-i tenemlen security maparen repringba ajanga telemsa tuluba akümer" ta RRAG director Suhas Chakma-i ashi.

"May 6 nü Constitution of India indang Arlla 355 mapa benokaka tensa maziüokteter anungji shinga tsütsü mashiba sorkar ka akümtsü atema Arlla

356 benoktsüsa kümogo" ta pai ashi.

Meitei aser Kuki nunger telungpur teloktemi shilem agiba ajanga northeastern region nung telungpur maparen tuluba inyaksangshia aotsü lenmang lir ta Suhas Chakma-isa ashi.

Manipur tensa azüoktsü atema President's Rule benoktsüla aser Governor lenisüba kübok yimjung maparen tenzüka pei talidak toktsür aoertem yaritsüla ta RRAG-isa metetdaksü.

"Manipur nung tensa balaka memelenshi aser July 2 nü ano nisung 10 tepsetba ajanga tensa mesüingjemtsüsa kümogo" ta parnokisa ashi.

Manipur telongtet nung nisung 50,698 tashi relief camp balala nung jenoka lir aser ano nisung aika Mizoram, Assam o Meghalaya nung jenoka lir. Kuki nungertemi tanga state tem nung aser talisa Meghalaya nung timtem ajurur ta RRAG-i ashi.

"Manipur nung prangpong-injang auyaba atema kecha meinyaker, telungpur telok 23 den Suspension of Operations (SoO) agreements shitak meinyakteter aser May 6 nü Constitution indang Arlla 355 benokaka tensa maziüokteter" ta parnokisa metetdaksü.

## Northeast nung tzunglu kanga arutsü: IMD

**Guwahati, July 3, 2023 (Agencies):** Assam aser Northeastern region kübok tesem aika nung tzümet süng timtem ajurua aliba mapang ka nung Indian Meteorological Department (IMD)-i Hombarnü July 7 tashi tzunglu kanga arutsü osang metetdaksüogo.

Northeastern state tem nung aser talisa Assam aser Meghalaya nung tzunglu kanga arutsü ta IMD-i ashi.

Taruba anogo pungu

tsüingda Assam, Meghalaya, Arunachal Pradesh, Nagaland, Manipur, Mizoram aser Tripura kübok tesem kar nung tzunglu (64.5 mm - 224.5 mm) arutsü ta IMD-i metetdaksü.

July 4 tashi Assam, Meghalaya aser Arunachal Pradesh atema 'orange alert' sangoktsür ta parnokisa ashi.

Bodbar nungi tenzüker Assam, Meghalaya aser Arunachal den tanüingba state tem 'yellow watch' alitsü ta IMD-isa ashi.

## Supreme Court-i Manipur sorkar dang status report meshir

**New Delhi, July 3, 2023 (Agencies):** Supreme Court-i Manipur sorkar dang rehabilitation mapa inyakba aser law & order tajungba akümba indang status report ka meshiogo.

Chief Justice D Y Chandrachud-i aniba bench-i Hombarnü iba tetuyuba agütsü aser July 10 nü angadangsü mapang latetogo. Iba bench nung Justice P S Narasimha aser Justice Manoj Misra na dena lir. Tanü Manipur state sorkar

tenüing nung Solicitor General Tushar Mehta noktak aser idangji bench-i rehabilitation camps, law & order aser recovery of arms indang status report meshi.

Tanü Mehta-i security forces mapa lemsateptsü aser law & order tensa osang metetdaksü aser paisa curfew ghonda 24 nungi 5 ajemogo ta ashi.

Manipur sorkari security atema civil police, Indian reserve battalions aser Central Armed

Police Forces (CAPFs) indang company 114 mapa lemsateptsü ta Mehta-isa ashi.

Kuki teloktem atema senior advocate Colin Gonsalves-i onük benokba jembidang Mehta-i iba rara nung kin mebenoktsü ashi.

Telungpurtemi news program ka nung Kuki nunger samatsüsü jembiba atema kecha meinyaker aser iba ajanga state sorkari yaria Kuki nunger anema mapa inyakba sayur ta Gonsalves-i SC nung ashi.

## tEA-i tetsür shishilembar 16 nem interest free loan agütsü



**Kohima, July 3, 2023 (TYO):** Entrepreneurs Associates (tEA)-i Uplifting Women Street Vendors Program nung shilem ka ama Hombarnü tetsür street vendors 16 nem interest free loan (IFL) agütsüogo.

Red Cross Conference Hall, Kohima nung tEA Chief Executive Office Neichute Doulo-i tetsür street vendors nem loan agütsü.

Iba mapa nung Caring Friends, Mumbai ajanga yariteper. 2021 nungi tEA ajanga Nagaland aser Manipur nung tetsür 1000 tema nem IFL agüja arur.

Yimdong nung yokyayokjiba tetsürtem Covid wara mapang senotsü temadokba aser tanaben shishilembar mesüetba

khuret lemsatepba sülen tEA-i Uplifting Women Street Vendors Program tenzüka liasü.

Tetsür aonsotsü ayokertem indang khuret asadanga sülen iba mapa inyaktüsü tenzüka ta tEA Head of Communications Neikule Doulo-i ashi.

Iba sentong ya Kohima nung tetsür 16 nem training agüja tenzüka aser tang tashi nung state asem nung takok ngua agiyonga arur ta lai ashi.

Iba sentong nung adenba sülen la taküm melenshi aser senotsü anguba den shishilembaba jenjang ajungket ta street vendor Lonyi Yalie-i tEA den külemi inyaksema aruba osang lemsatep.

Iba sentong nung adener tetsür street vendors 60

ayongzüka jembidang tEA CEO, Doulo-i senotsü atema sentong tajung atongtsü aser anogoshia yokzüka nungi tarutsü atema 'Pay self first' ta ser sen tera agiteta ayutsü tayongzükba agütsü.

Paisa tetsür shishilembar dang senotsü rizünga ayutsü aser rongsen bendentsü ayongzük.

Sentong nung Nagaland State Legal Services Authority, Kezhosano Kikhi-ia Street Vendors Act indang onük jembida.

Kezhosano-i tetsürtem dang parnok temeten aser jenjang asoshi pressure groups tentettsü ayongzük.

Iba sentong nung SAIL - Specialised Accelerated Intensive Learning tenzüka liasü.

## DRDC GLOBAL indang international member & ambassador ama Imnasenla Rachel shimogo

**Dimapur, Chiteni/July 03 (TYO):** DRDC GLOBAL-Dawn Research and Development Council (DRDC) India atema International Member aser Ambassador ama Imnasenla Rachel shimogo.

Imnasenla Rachel ya LSH CERTIFIED (Legal Settlement House) indang International member aser Ambassador lir. La ya social activist, counsellor, host, digital marketer, lifestyle and beauty influencer, pageants balala nung takok angur aser Hyral Brand indang Ambassador lir.

Item mapa asoshi la shimtetba atema DRDC chairman, Dr S.R Sahoo aser board dang pelaba Rachel-i sangdong ka nung ashi.

Lanurtem dak sempet aser tashi peria lir, saka tamakok ajurutsü tetsübo agi aiben tim atemer, anungji lanurtemi tila nungi tenzüksüla, aser takok mangu tashi bushia, tendanga aser merangtsüla, ta lai ashi.

Pei sasa pei dak tamang akatsü kanga tongtipang aser loktiliba nem na manishidaktsütsüla, ta lai ashi.

"Nü sasa na dangar den medemdanga kazütsü dang nungi pei renlokba aser ainba nung rangloksü tongtipangtiba. Nisung shia lenmang aser



Imnasenla Rachel

mapang balala lir, na takok angutsü atema nü jenjang dak metaloka malitsüla," ta Imnasenla Rachel-i ashi.

Lai lanurtem dang angazüktsü aser aintsü atema tamakok agizüktsüla aser tamakok ya yimya dang lir aser pei mangdang bushiba nung tamakok agi tetsükdaktsü magütsütsüla, ta ashi.

Tayongzükba aser tetsükdaktsü ajangteta nokdaktetsüla aser ajangshibatem nungi jenjang aketba yimya angazüka pei takum aser wadang ainba nung amshitsüla, ta ashi.

DRDC GLOBAL (Dawn Research and Development Council) ya international organization ka lir, koba ajanga alima ajunga nung entrepreneurship, research aser

temelenshi tajung adokdaktsüba nung lenmang balala nungi yarir.

DRDC yagi national aser international organizations aser university balala den inyaker, aser United Nationd indang Sustainable Development Goals nung rangloker.

Chiyongtsü agütsüba, angati education agütsüba aser health wellness camp amala nung DRDC ajanga shilem agir. Iba tentet ya Euro Asian University, Central Cristian University, aser Cambridge Digital University USA ama international university tem den sendaktepa lir.

LSH CERTIFIED (Legal Settlement House) ya international law firm aser association ka lir, koba Supreme Court aser High Court law firms den sendaktepa lir.

LSH CERTIFIED yagi business strategy, operations, contracts, compliance, real estate, international mediation, taxation, licensing, aser business performance amala nung legal consultation agütsür.

LSH yagi brand recognition aser profitability timba kumdaktsütsü asoshi certification aser marketing services agütsür. LSH ya India, Londin, USA aser UAE nung lir.

## NSEE candidate temi Acceptance Letter agütsütsüla

**Dimapur, Chiteni/July 03 (TYO):** Directorate of Technical Education ajanga Nagaland State Entrance Examination (NSEE)-2023 candidate tem dang sangdong ka nung ashiba agi, Nagaland State Entrance Examination (NSEE-2023) indang merit list nung ajemdaker academic session 2023-24 mapang Para Medical / Agri. & Allied Courses nung Under-Graduate Degree courses agitsü

atema Common Selection Board ajanga candidate tem shimogo.

Candidate tem asoshi 'option exercise' ya website: dtenagaland.org.in aser Directorate Notice board nung angutsü.

Shimtetba aliba candidate temi NSEE-2023 linük künok website; dtenagaland.org.in ajanga 'acceptance mesüra refusal letter' ya online nung July 4, 2023 nikongdang 5:00 ako

tashinung agütsütsüla, ta sangdong ajanga ashi.

Shia aliba mapang tashinung acceptance mesüra refusal letter magütsütetra pa mesüra la nomination magitsü.

Iba dak sendakba nung tali tejangjaba metettsü asoshi website dtenagaland.org.in/ nung angutsü mesüra office mapang phone number 9233959973 ajanga tongteprateptsü akok, ta sangdong ajanga ashi.

## LFI nung NCC Cadets temi Dhansiri ayong mürek



**Dimapur, Chiteni/July 03 (TYO):** World Plastic Bag Free Day nungtem nung Livingstone Foundation International nung nung aliba Junior Division aser Senior Wing nungi NCC Cadest 40 den Associate NCC Officer, Second Officer (S/O) Kajenkala T. Longchar nungeri

July 3, 2023 nü Sangtamtilla anasa Dhansiri ayong nungi plastic jana aser danga jana tem indoka liasü.

Iba cleanliness drive ya anepdang 9:30 ako nungi 11:00 ako tashi inyaker aser iba mapang cadets temi Sangtamtilla nung aliba Dhansiri ayongkum anatsülen

nungi jana-reja indoka liasü.

National Cadet Corps (NCC) ajanga July 3 nungi July 9 tashi social service aser community development inyaksangshitsü asoshi tenzükba Puneet Sagar Abhiyan nung shilem ka ama iba mürekmejuba sentong ya ayongzükba liasü.

## World Population Day 2023 amungtsü atema metetdaktsür

**Dimapur, Chiteni/July 03 (TYO):** Taküm World Population Day 2023 ya "On occasion of Azadi ka Amrit Mohatsav, let us pledge to adopt family planning as a choice for happiness and prosperity" omen nung ajemdaker amungtsü.

Iba nungtem nung Department of Health and Family Welfare, Mokokchung ajanga July 11-24, 2023 anogotem population fortnight ayongzüktsü.

Chief Medical Officer Office, Mokokchung ajanga sangdong

ka nung ashiba agi, iba mapang tubectomy, IUCD inokba angati agütsütsü.

Tubectomy/IUCD ya District Hospital Mokokchung nung inyaksü aser IUCD inokba maparen ya PHCs aser CHCs nung shia aliba anogotem nung inoktetsü.

Item teyari aginer temi June 27 nungi July 10, 2023 tashi mobilization fortnight aliba mapang ASHAs nem pei tenting agütsütsüla mesüra anasatiba health centre semdangtsü akok, ta sangdong ajanga ashi.

## GPPK ajanga Library hours cum computer training agütsü



**Dimapur, Chiteni/July 03 (TYO):** Gorkha Public Panchayat Kohima (GPPK) ajanga Kohima district nung aliba Gorkha nung kaketshir Class 3 nungi 8 tashi atema hopta tepiyong katsüba Library hours cum hands on computer programme tatembang sentong Multi-Utility hall, GPPK complex Chandmari Kohima nung July 2, 2023 nü agia liasü.

Iba sentong nung tesemdang tongti Ranjit Lama, former Advisor, GPPK liasü. Iba sentong nung menden Y.B.Rana, Treasurer GPPK liasü.

Ranjit Lama-i iba sentong nung jembidang, summer vacation mapang GPPK ajanga iba sentong ayongzükba aser lenla balala nungi shisalen

sayurtem anir arua kaketshir nem shisatsü tajung agütsüba asoshi tenütsang agütsü aser iba sentong takok angutsü asoshi shisalen sayur, tsürabortem aser nüburttem yaritepba atema pelaba lemsatapa liasü.

Maneni iba sentong nung sayubatem tanurtemi angazükba atema pelaba lemsatapa liasü.

Programme Director, Monoj Rai ajanga hopta tepiyong sentong akaba indang osang agütsü aser shilem agirtem tenüng nung Kriti Thapa-i iba sentong nung ajangshibatem aser angazükbatem lemsatapa liasü.

Kaketshir nungia tsütsang ka agi shilem agi aser Prem Pradhan ajanga melepzüng o jembia sentong tembanga liasü.

## World Population Day 2023 amungtsü atema metetdaktsür

**Dimapur, Chiteni/July 03 (TYO):** Taküm World Population Day 2023 ya "On occasion of Azadi ka Amrit Mohatsav, let us pledge to adopt family planning as a choice for happiness and prosperity" omen nung ajemdaker amungtsü.

Iba nungtem nung Department of Health and Family Welfare, Mokokchung ajanga July 11-24, 2023 anogotem population fortnight ayongzüktsü.

Chief Medical Officer Office, Mokokchung ajanga sangdong

ka nung ashiba agi, iba mapang tubectomy, IUCD inokba angati agütsütsü.

Tubectomy/IUCD ya District Hospital Mokokchung nung inyaksü aser IUCD inokba maparen ya PHCs aser CHCs nung shia aliba anogotem nung inoktetsü.

Item teyari aginer temi June 27 nungi July 10, 2023 tashi mobilization fortnight aliba mapang ASHAs nem pei tenting agütsütsüla mesüra anasatiba health centre semdangtsü akok, ta sangdong ajanga ashi.

## DC Kohima ajanga nüburttem dang metetdaktsür

**Dimapur, Chiteni/July 03 (TYO):** 1 (LH) Assam Rifles, Kohima ajanga Firing Range Kohima Garrison nung July 1, 2023 nungi July 31, 2023 tashi Test Firing tenzükba lir, anungji nisung shinga iba tesem leni

maotsü metetdaktsür, ta Deputy Commissioner, Kohima, Shanavas C. IAS ajanga Kohima Municipality kübok aliba yimdaklir aser nüburttem dang sangdong ka nung metetdaktsü.



July 03, 2023 nü Bengaluru nung Karnataka Governor, Thaawar Chand Gehlot-i state assembly nung jembidang tangokba noksa nung angur.

### Modi leniba nung SCO linüktem nungi lenirtem senden amentsü

**New Delhi, July 03 (Agencies):** Mongolbarnü Ato kilonser, Narendra Modi leniba nung SCO züngsem linüktem nungi tekolakpurtem senden amentsü; video conferencing ajanga agiba senden nungji China Tir Xi Jinping, Russia Tir Vladimir Putin, Pakistan Tir Shehbaz Sharif aser SCO linüktem nungi lenirtem adentsü.

Iba senden nung regional security tensa asadangsü aser linüktem tsüngda connectivity aser shishilembaba jenjang tajungba akümtsü atema jembitsü.

Taoba hopta Russia nung telok kati Putin anema apusoba sülen tang mezüng Putin-i linük balala nungi lenirtem senden nung shilem agitsü.

India Tir leniba nung Shanghai Cooperation Organisation (SCO) nung

permanent züngsem tasen, Iran agizüksü.

SCO senden nungsa Afghanistan tensa, Ukraine nung rara aser SCO züngsem linüktem tsüngda amalitep jenjang tajungba akümtsü atema jembitsü, ta osang angazüker.

Küm asem tashi anüdoklen Ladakh nung China aser India sepaitem tsüngda tensa mejungi aliba sülen aser Ato kilonser, Modi-i US semdangba sülen hopta ana shi lir SCO senden amentsü.

SCO züngsem linüktemji India, China, Russia, Pakistan, Kazakhstan, Kyrgyzstan, Tajikistan aser Uzbekistan lir, aser iba telok ya rongsenkettsüng aser security bloc ka lir.

Yaküm September 16 nü Samarkhand nung SCO senden amenba sülen SCO nung India-i chairmanship agizüka liasü.

Mongolbarnü senden nungsa SCO tentet ana- Secretariat aser SCO RATS (Regional Anti-Terrorist Structure) nungi züngsemtem-a adentsü.

Kasa senden nung adentsü atema international aser regional organisation 6 jaokogo aser item organizations ji- UN, ASEAN (Association of Southeast Asian Nations), CIS (Commonwealth of Independent States), CSTO (Collective Security Treaty Organisation), EAEU (Eurasian Economic Union) aser CICA (Conference on Interaction & Confidence Building Measures in Asia) lir.

India ya mezüng 2005 küm SCO nung observer linük aküm aser 2017 küm Astana nung SCO senden amenba mapang SCO nung permanent züngsem aküm.

### Mapang tetemsü nung party ajak longjemtsü: JD(U)

**Patna, July 03 (Agencies):** Hombarnü Bihar nung minister aser Uttar Pradesh atema JD(U) in-charge, Shrawan Kumar-i, BSP tongti lenir, Mayawati-i opposition party tem teloktep nung adentsü, ta metetdaksü.

Osangbenertemi, kechiba Mayawati-i Patna nung ayongzükba opposition party tem senden nung maden?, ta asüngdangba langzüdang Kumar-i, "Mapang tetemsü nung party ajak longjemtsü. Nisung ajak longjemtsü," ta ashi.

Mayawati-i opposition telongjem nung adentsü asü?, ta asüngdangba langzüdang pai "Ata-a liang, kü nem mapang tera agüjang. Tarutsü nung nenoki ashibaji ataloktsü," ta ashi.

Sangküm Lok Sabha election agitsü lia opposition party temi asalentong yanglutsü atema taoba ita Bihar Chief Minister, Nitish Kumar-i Patna nung senden ayongzüka liasü, aser iba senden nungji opposition party 17-i taruba Lok Sabha election nung lokteper

tokteptsü lemtet. Maharashtra nung NCP telemsa adokba dak sendakba nung Kumar-i, "BJP atema tanga mapa teinyaktsü anünga mali. Party tem loksar aser maneni parnokki loksatsü. Linük atema tebilemstü onükji osettsüset jenjang atuba aser mapa manguba tebilemstü lir," ta ashi.

Uniform Civil Code dak sendakba nung party tangatetba asüngdangba langzüdang pai, JD(U)-i UCC anema nokdaksü, ta ashi.



July 03, 2023 nü Jaipur nung osangbenertem senden ka nung BJP MP, Diya Kumari den party lenirtemi Rajasthan nung tetsürtem anema inyakba kanga bulua atalokba atema sorkar aija poster sayaba noksa nung angur.

### NCP nung telemsa adokba ajanga MVA mekongshitsü: Sharad Pawar

**Mumbai, July 03 (Agencies):** NCP nung telemsa adoka Ajit Pawar leniba nung NCP MLA 9 pakzuka oa Maharashtra nung Eknath Shinde-i aniba sorkar nung adenba sülen Congress Tir, Mallikarjun Kharge, Congress lenir, Sonia Gandhi aser Rahul Gandhi hungeri NCP Tir, Sharad Pawar den jembia iba osang metetpelaa liasü.

Osang angazüka agi, NCP Tir Sharad Pawar-i Congress party nung lenir ana dang, "Telemsa adokdaksüba ya Delhi nungi lir, ajisiüka iba ya khen atema dang asütsü aser iba ya ajanga MVA teloktep mekongshitsü," ta shiogo.

Maharashtra nung NCP, Congress aser Uddhav Balasaheb Thackeray-i aniba Shiv Sena teloktep dang (Maha Vikas Aghadi) MVA ajar.

Ano külen Congress party-i, party tem nung telemsa adokdaksütsü atema BJP-i enforcement agencies amshir, aser Eknath Shinde-i aniba sorkar ya-a item ama ochimashi aser temenen ajanga lir, ta aitsüogo.

Congress general secretary, K C Venugopal-i, "BJP indang tesempatsü asalentong department-i Maharashtra nung mapa inyaker. Iba sorkar ya

nüburtemi shimtetba sorkar masü saka ED-i lenmang lapokja tashi rakzükba lir. Maharashtra sorkar ya ochimashi aser temenen ajanga adokba lir. Nüburtemi Maharashtra nung tashioktsürtem, ochimashirtem aser seplasepshir lenirtem jungjunga jangjaogo, aser taruba elections nung parnok ajak dang taküm piyong atema tansütsü sayutsü," ta metetdaksü.

Venugopal-i, June 29 nü Ato kilonser Narendra Modi-i tang BJP den adener lenirtem ochimashiba atema jembia liasü, ta ashi.

"Tangbo Ato kilonseri washing machine tsükloker ama reprangteter, aser item lenirtem tenangzükba agiba sülenbo kanga temerük kümogo," ta pai ashi.

Congress otongdar Jairam Ramesh-ia, "BJP indang washing machine amshi tenzükogo. Tanü Maharashtra nung BJP-i aniba teloktep nung adener tasenpurtem anema ochimashi ken otem benoka liasü aser ED, CBI den income tax ketdangsertemi parnok anema mita liasü. Tangbo parnok ajak temerük kümogo. BJP talenba nungi Maharashtra salatsütsü atema Congress-i ano tali temerangba inyaktsü," ta metetdaksü.



July 03, 2023 nü New Delhi nung External Affairs Minister, S. Jaishankar-i 'NIT Students Dialogue' nung jembidang tangokba noksa nung angur.

### Khalistani ji India aser partner linüktem atema majung: Jaishankar

**New Delhi, July 03 (Agencies):** Hombarnü India External Affairs Minister, S Jaishankar-i alia oa inyakba Khalistani tangatetbaji India mesüra US, UK, Canada aser Australia ama India partner linüktem atema majung, ta metetdaksü.

BJP sentong ka tembangba sülen osangbenertem den jembidang Jaishankar-i, tawa Canada nung rally ka nung Khalistan pusemba posters amshiba atema sorkari jembitsü, ta metetdaksü.

"Khalistani sentongtem agiba Canada, US, UK aser Australia linüktem ama asen partner linüktem dang onoki Khalistanis nem maongka magütsütsü metetdaksüogo. Kechiyong alia oa inyakba aser tangatetbaji asenok atema majung, parnok atema-a majung aser linüktem tsüngda

tesendaktep atema-a majung," ta Jaishankar-isa metetdaksü. "Item posters amshiba atema onoki item linük sorkartem den jembitsü," ta pai metetdaksü.

Canada nung Khalistan rally ka nung 1985 küm Air India tayimtsü poksatsüba tatalokba nung tai tonglokja alir tongti, Talwinder Parmar indang noksa amshia liasü. Iba ya Parmar nem tetushi agütsütsü nükjidong nung inyak.

July 08, 2023 nü agitsü aliba Khalistan rally indang posters ajangasa Indian High Commissioner, Sanjay Kumar Verma aser Toronto nung Consul General, Apoorva Srivastava na amokmerenogo.

Canada nung India nungi ketdangsertem amokmerenba sülen India sorkari Canada nung ketdangsertem den iba tebilemstü lemsatepogo.



## TIR YIMYIM YIMOBILEM (EDITORIAL)

DIMAPUR SANGTENNÜ, CHITENI (JULY) 04, 2023

### BJP-i Pawar vs Pawar inyaktetogo

- P Tiamongba Aier

June 27, 2023 nü Prime Minister Narendra Modi i Bhopal nung BJP züngsemtem den jembidang Sharad Pawar-i aniba Nationalist Congress Party (NCP) ajanga Rs 70,000 crore tim mesüi amshiogo ta tai tonglokja liasü. Iba ken o nung tongti süa tai tonglokja alibaji NCP lennir Ajit Pawar saka July 2, 2023 nü BJP-i pa Maharashtra nung deputy chief minister kümdaktsüogo. Iba ajanga Shiv Sena nungi pilar Eknath Shinde-i aniba sorkar nung Ajit Pawar-i BJP züngsem Devendra Fadnavis den külemi deputy chief minister inyaktsü. BJP indang inyakyim kaji tamasa Opposition lennirtem anema ochimashi ken o benoktsü mesüra tai tongloktsütsü aser iba sülen item Opposition lennirtem parnok i anioktsü ta asüba lir. Opposition party ka nungi lennirtem BJP nung adenba nung taoksatsü balaka mali saka Maharashtra nung iba mapa kanga otiotia inyakba ajanga nisung aika süngmangdaktsüogo. Yaküm Shiv Sena telok ana küma lemsaba ken o ano metembang aliba mapang ka nung ano NCP atemaa kasa ken o ka adokogo. Shiv Sena indang ken o ya Supreme Court-i Maharashtra indang Speaker court dang bentettsü tetuyuba agüja lir saka iba ken o metembangdang ano Speaker atema ken o ka adokogo. BJP-i kanga dang aritepa NCP telok ana akümtsü mapa inyakogo. Parnoki Ajit Pawar indang teyari agiba ya Eknath Shinde-i aniba sorkar akangshitsü atema masü saka sangküm parliamentary election agitsü aliba atema inyakba lir. Shinde-i BJP den tesentaktep yangluba sülen küm ka süia arudang sangküm parliamentary election nung taoba Shiv Sena züngsemtem nungi teyari balaka mangutsü ta ajitetba agi BJP-i NCP anisemogo. Küm ka süiaka Shinde-Fadnavis sorkari cabinet ulushiba maparen meinyaker aser iba ajanga municipalities 200 aser municipal corporations 23 indang elections thinena dang arudar. BJP-i parnok tashi itshitsü atema langka ka nüngdaka liasü aser iba atema parnok i Ajit Pawar-i parnok kübok aniokogo. 2019 küm Ajit-i Fadnavis den tesentaktep yanglutsü merangba nung tamakok ngua liasü. 1999 küm Sharad Pawar-i NCP tentetba sülen nungi Ajit ya pa atema temdangsüngdang ka ama aruogo. Sharad-i Ajit nem tongtipang mapa magütsü dang aruba agi Ajit mepelai liasü aser iba ya Ajit-i NCP nem akhümtsübu magütsüba ajanga liasü. Sharad Pawar ama masü Ajit yabo khen nung mit adokba nisung ka lir aser BJP-i ibaji kanga junga meteta mapang talangka nungi pa mesüa aru. Sharad Pawar madak takok angutsü atema Ait Pawar azüoktsüla ta BJP-i asalentong yanglur pa mesüzüka aru. 2014 elections matongdang Fadnavis-i NCP nung Ajit aser par medemertemi ochimashi inyakogo ta kanga aija aru saka pa chief minister akümba sülen iba ken o atema balaka meinyak. Iba sülen 2019 küm Fadnavis-Ajit Pawar tesentaktep aliba mapang ochimashi ken o nungi Ajit tenüng agientsü lemtet agi. Tanübo BJP-i tai tongloktsüba NCP züngsem ajak Fadnavis-Shinde sorkar nung denogo. Centre sorkar akümba nung Maharashtra ya kanga tongtipang asütsü aser iba jagi BJP-i Ajit Pawar aser par medemertemi aniokogo, kechiyong 2024 general elections nung BJP-i state aika nung parnok i bilemba menden mangutsü ama arentaka bilemer. Iba jagi BJP-i Maharashtra nungbo Sharad Pawar vs Ajit Pawar inyaktetogo aser ano taruba ita ishika tsüngda tanga state tem nunga iba mesükba mapa inyaktsü akok kechiyong parnok i Centre sorkar ketdangsüa onür.

## OLEMSABANG

### YASHI ASER TANÜ TETSÜR OTSÜREN

- P.Renthy Jamir

Taoba ocet nung Nüngja aser tetsür libaliru indang tatsüka zülüogo . Tang yangi lipok nungi tanü tashi alima nung tetsürtem dak sentakba otsüren ataloka aruba kar lemsateper. Shisa taka Solomoni Apijemtsü shin züludang tetsür tamajung agi tenzük ta ashir .La tejepjep aser tenarong maket ano tatem nung tetemsü tetsür agi tembang, Lai shisa kaa ta tebang lapoker .Alima nung tetsür ya onsara tongtibang ta yangi shinür tamasabaji teburtemi tetsür atema taküm tenlaba tetsür tobur tajung kaji kecha dena medemdangtsü makok.Indian history nung Sita tobur ajungba taküm kümzüktsü Ram-i Cylon chuba Ravana den raradang linük ana tsüngda tetsür ka mechi tebur nübu zünger mezüngma sama.Greek nunger otsü Helen of Troy la mechi tebur nübu meyirijang aika samaba jembir Chittor Chuba Ranasingh tebuttsü Padmini tobur ajungba apuayua Delhi Chuba Alaluddin-I Chittor amakdang tebur nübu zünger mezüngma tepsetba otsü jembir Ano Delhi chuba Prithviraj Chauhan aser Kanauj Chuba Jaichan na tetsür ka raktepdang yimli ana nung tebur nübu tajung ajak samar tangar muslim kin Muhammad Ghor jaoka India nung Muslim yimli amenokba otsüren lir.David chubaia tetsür tobur tajung ka mechi Israel sepoy ashikülaka sädaktsüba jembir. Item yagi sayur tetsür tobur tajung kaji tebur meyirijang aika den medemdangtsü makok.

Mugal Emperor Shah Jahani pa kinungtsü Mumtaz onsara meim.Kechiyong lai tetemsü kinungtsü ka ama kinungbu mulungchia litet.Anungji la teubai la Nungyu leper yanglutsü atema mistry aser labour nisung 20,000 küm 20 tashi inyakdakja Taj Mahal yanglutsübajia tetsur ka atema tebur nübu aser linük rongsen entokba otsüsa ta züngshir .Teburtemi tetsür meimba item yagi sayur.Japan nungbo kinungburtemi hapta nung anogo ka temeim kinungtsü anogo ta jar Beloved Wives Day (Tuesday) mapa nungi Office nungi arudang I love you ta shia kidangi arur ta ashir. Alima otsü nung takotet tetsürtemji tejen otsü bushia maoyonga aseni angashiba alima tokolak tetsür kar otsü bena arudi .Mezüng tetsür Prime Minister Sirimavo Bendarnaike Sri Lanka, la yimsüsüba mendeni tur küm 12 tashi timtema army jenti taküm lalua makok lia aliba Jaffna atsüngteta yimjung bener aru. Tanabuba Israel Prime Minister Golda Meir la lar lima Prime Minister inyakdang Arab countries ajak neplanepshia koker Israel lima tuluba küma yanglu lai inyakba ama teburtemi meinyak.Tasembuba England Prime Minister Margaret Thatcher la mapang Falkland Island atema raradang Argentina tongpang menüngshia akok La U.K nung Prime Minister talangtiba inyak.Lai alima rangben asoshi takok ngua inyakba Berlin Wall tepsaa entok, Cold War tatem küma anendaktsü. Anungji la nem naroküm Iron Lady yin ama temerang ta agütsü.Margaret Thatcher mangzüba Anogo 8-4-2013 nungbo England lima teti atemba Anütetsü (Big Ben on parliament Tower) dena ola madokdaktsü shibanga ayu.Alima kin 170 nungi la mangmungdaki aru police 4000 duty noktak.Pastorbai Yohan 14:1-4 azüng lar semchirtemi Efesa 6-10-13 azüng ken Tematiba Temeim Love Divine Ao ken 367 aten tebur shinga yamaji tushia meintok .

Pezübuba Indira Gandhi la ama Prime Minister mapa India nung teburtemi meinyakteter. La mapang Pakistan den raraba tongpang ajak kokteta aru.Aser tesü 1971 war nung Pakistan army meyirijang tukur pungo taküm apu la yamaji tasü tait tashi tulu yimsüsür liaka la jakla yimya ajungba nüburttemi jembir.Indian sepoy tuluba Sam Manekshaw la indang yamai ashi.Ni tetsür kar kü kinungtsü dena ain adokba angu. Saka Indira Gandhi ama kodanga mangu (I have seen several angry women including my wife . But never one like Mrs.Gandhi) Lai India lima asoshi la taküm tenla.Pakistan lima alima tamajung Z.A.Bhutto tepseta entoker par jala Benazir Bhutto lai Prime Minister inyakdang linük nung temelenshi aika bener aru.Aser lar lima asoshi la taküm agi tenla , yamajisa Burma lima teraksa nüburttemi anema Aung San Kyi lai küm jenti reshikangshi tulu arema lar lima nubur kümzüktsü tasü ita tasü majemi teraksa anema rarar la ama pei nubur asoshi timtem aremer alima nung aika mali .Tang tetsür shisa taka shirnoki shisa kaa tebang lapoker ta ashiba onük dangi arudi.Alimai senpet tulutiba (Nobel Peace prize) agütsüba tetemsü tetsür Mother Teresa Lai yamai ashi "Arung asenok kati ka den teti menürema ajurutepti, kechiaser menüremji temeim tetenzükdak" (Let us always meet each other with a smile, for the smile is the beginning of love ) Iba oren ya alima nung jangratemtsü aketba oren ka ta bilemer.Mother Teresa shibai bendang lima arua Calcutta yimti nung India nunger sensaker timtemer shiranga komo agi zükbanger alir ajak Yisu mesük angu ta ashir Lai menürem jakten tener taküm piyong timtemer yari.Sonia Gandhi bendangtsür India nung arua la kabu nung tenü anepbalua sädaktsü teuba tepseter küm ter Prime Minister inyaktsü lia Man Mohan Singh nem inyakdaktsü.Ano teuba tepsettsü sentong yanglur Nalini Vellore jail nung lia lua ozui ne dang tai atoker ta ashi.Asenokibo government dang tai mapa inyaker atema tapet temerenshi agüjang ta jail ki tepsaja police den rarateper.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Japan nunger oshi nung Laishiba meyipsang, Reiji Oyama süogo

**July 03, 2023:** Japanese oshi nung Laishiba meyipsang aser Japan Evangelical Association (JEA) tenzükertem rongnung ka, Reiji Oyama alima nungi pilaogo; pa arrshi küm 96 liasü.

May 16, 2023 nü Oyama-i pai tamalen tenzükba Tokyo Graduate School of Theology nungi staff kar aser American seminary nungia lenirtem kar ajurua Doctor of Ministry (DMin) program atema partnership yanglutsü asoshi jembia liasü. Iba sülen parnok chiyungtepba mapang nung pa tenük amouzüka ao, tera menürem, iba sülen süadok.

1960 küm pai par oshi nung Laishiba meyip tenzükba liasü. Pai mezüng Filemon-i züluba shidi meyip aser 1978 küm tashi nungbo Japanese oshi nung Tasen Lai ajak meyipzükba liasü.

Japanese oshi nung iba dangji 'Gendaijin no Seisho' mesüra "Tanü putu nisungtem atema Laishiba' aja, ajisüaka Oyama-ibo English oshi nung "Angatettsü akokba Laishiba" ta amshia liasü.

Nisung aikati Laishiba azüngtsü kanga tasak ta bilemba agi nisung aikati Laishiba mazünger, ajisüaka tasakji Laishiba nung keta mali saka meyipzükbayim dak dang keta lir, ta Oyama-i ashi.


Pa asüpila sentong nung jembidang par jala, Megumi Okano-i, "Anogo shia kübui ajemalua tamang akatsü atema sayua liasü. Laishiba nung shia alibatemi ni ajemalua agizük aser Lai O ya atangji ta ni amanger," ta lai ashi.

Reiji Oyama ya 1927 küm January 15 nü Japan yimtiba, Tokyo nung aso. Tebu, T?ji ya Mitsukoshi department store ka nung manager liasü. World War II tenzükba mapang nung Oyama ya Japanese Imperial Army Accounting Academy nung high school cadet aküm. Iba academy nung martial arts aser kor nung asangba sayua liasü.

World War II tembangba sülen pa Waseda University nung azüng aser Arogo indang Bible class nung pai English oshi angazüka liasü. Par medemer Khristan aser US army sergeant Henry Ikemoto-i 'G.I. Gospel Hour' ta ajaba evangelistic sentong ka nung adentsü pa aiben ajungshia liasü.

Oyama-i aiben iba sentong nung adentsü memelung, ajisüaka tesüsa pa temang mejungi liaka pai iba sentong nungji aden.

Iba sentong nungji Japan nunger sayutsünger, Ugo Nakata-i Yisu Kangki indang onük jembia aser shirangertem atema sarasademtsüba mapang nungjisa Oyama shiranga anepadok. Yamaji pa arrshi küm 19 lia 1946 küm November 30 nü pai pa taküm



Pastor, Reiji Oyama

Khrista nem bendanga agütsü. "Ni menenpur ka ta ni angatet, ajisüaka Kibubai kü temenen ajak tai tokogo ta ni amanga liasü," ta Oyama-i metetdaksü.

Class takdang agi meperiba agi Waseda University nung Amongnü anogotem nunga class agiba mapang nung Oyama-i University campus nungji Bible studies ayongzükba agi. Tesülen Bible study aser tekülem sentong agiba dangji Christian Student Association (Kirisutosha Gakusei Kai) ta aja aser tanübo KJK ji International Fellowship of Evangelical Students (IFES) nung densema lir. Oyama-i Khristan sentongtem ayongzükba agiba mapang nung tetsür ka, Michiko Hirayama densema nisung tenet tzü nung bapti. Tesülen Oyama-i la den kibong aküm.

Graduate asüba sülen anepdang ka pa sarasademba mapang nung pa pastor akümtsü tajaba pai angateta liasü, anungji pai Tokyo Christian Theological Seminary nung azüngba sülen 1953 küm pai Takadanobaba Bible Arogo tentet. Tangbo iba Arogo dang Biblical Church of Tokyo (Seisho Kirisuto Kyokai) ta ajar.

Oyama nem akhüm agüja Lausanne Movement honorary chairman, Doug Birdsall-i, Japan nunger nem Yisu tenüng metetdaksütsüji Oyama atema tongtibangtiba mapa liasü, ta ashi.

"Mathi 6:33 nung shia aliba ama pai ali aser pai Tsüngrem tama südaksü," ta Doug-i ashi.

Oyama-i Japan nung Khrista osangtajung proksü atema inyakba mapang nungsa pai Ibri aser Greek oshi Laishiba nung aliba ama par oshi nung Lai shidak meyiptsütsü merang.

Yamaji par oshi nung Laishiba ajakji 1988 küm tashi nung meyipzükba liasü.

Tanü putu nung pai meyipzükba Japanese Bible translation (Gendaiyaku Seisho) ya Amazon's list of Japanese Christian Bibles nung jenjang 44buba nung lir.

Pastor ka ama Oyama-i tamangertem atema Laishiba meyipzükba dang masü saka Lai dak sendakba kakat aika zülua liasü. Pai züluba kakattemji Laishiba tsütsülen nungi Khristan yimsü ya atangji ta o lemtepa, nisung ka asüba

sülen kechi ataloker aser Laishiba nung keta aliba kakat balala ratettsüba kakattem lir.

Paisa 1969 küm Tokyo Graduate School of Theology tenzük aser iba reju nung pastor aser Arogo lenir tasenpurtem nem training agütsür.

Pai mezüng Japan toktsür bendangleni aoba linükji Philippines liasü. Kibubai pa den yamai jembia liasü, "Filipino nunger dangi oa parnok tetsüng shidoktsütsü aser Tsüngrem temeim lemsateptsü atema Ni na parnok dangi yoker."

Yamaji Philippines nung Oyama-i ita pezü tashi evangelistic sentongtem ayongzükba agi aser World War II sülen Philippines-i aoer Japan nunger missionary tem mezüngbubaji pa liasü.

Oyama-i yarisema 1968 küm Japanese Evangelical Association tenteta liasü. Tokyo nung Billy Graham International Convention agiba sülen küm ka dang lirbo Japanese Evangelical Association ya tentet. Billy Graham International Convention sentong nungji Japan nunger tamanger 15,000 dak tema dena liasü.

2010 küm Tokyo nung Global Missions Conference aliba mapang nung Oyama-i yimjak nung Japan nungertemi akhidang Mongolia, Taiwan aser China atsünga agia yimsüsüba atema tatok meshia liasü. Iba mapang nungji pai, "Japan nungertemi kidanger linüktem nung nisung aika tepset, auya, tashiyim amshia raksatsü aser mezüngmeshia liasü. Anungji Japan nunger ka ama ni item mapatem atema tatok meshir," ta jembia liasü.

## ANOGO ABEN TSÜNGREM DEN

### Aieni Aoba Nung Tetsükdaksü

T.Ken 114:1-8

Nai tzüyim jena aoba ngua lir ma? Nai tenemtem san tepung ama pungtenba, tenem tilatem san chanu ama kechi agi pungtendaksü ngua lir ma? Ibaji Israel Ijip nungi anitetba ken züluri tatsü agi ashiba lir. "Tzüyim agi angu aser jena ao; Yordani meyipa ao... Na alima, Kibuba tsüngdang, Yakob Tsüngrem tsüngdang atentenang. Shibai lung agi tzütu kümdaksü, züpu lung agi tzüpokdak kümdaksü" (t.3,4,7,8).

Ken züluri Tsüngremi Temerem Tzüyim lapoker Israel nunger ali takong nung jajadaksüba ajanga adokdaksüba ashir. Pai kinji Yordan Ayong ali takong nung jaja tenangzükba Limai anir ai. Pai parnoki lenmang nung ajuruba indang ashi, kodang parnok tzüra. Tsüngremi lungji tzütu kümdaksü.

Item tajangshibatem nungi asenoki kechi angazüker? Tsüngrem asen taküm timtem aser koda masü tia ajak nung yarir. Kodang nai ne timtem Pa nem agütsür, Pai yarir. Pai kechi inyaker? Ken ken Pai tenokdangtsüji agientsür. Teimla makadak ajak nung Tsüngrem asenok den lir. Israel nung temerem Tzüyim nung koda teyimla makai liasü! Tsükchir sepoytemi parnok sülen liasü; arem, parnok meketa liasü; parnok jakdang tzüyim liasü. Saka jentettsü asoshi Tsüngremi lenmang lapoktsü.

Ken ken tenokdangtsü adoktsür- tenem "tilatem" aser tenem "tulutem" Pai itemji shiruru ama jena odaktsür. Pai ano tenokdangtsüji temoatsütem kümdaksür. "Pai lungtemji tzütu kümdaksü aser züpu lung tzüpokdak kümdaksü" (t.8). Tsüngremi ne timtemji magienra aser meindoktsüra itemji temoatsütem kümdaksür.

Ne timtem nung Tsüngrem dak amangang. Pai na teimla makadak yaritsü, tenem, tarok ajak nung yaritsü.

## Impur-i arurtem aser süisüpongertem atema building ka semzük



**Impur, July 03, 2023 (TYO):** Impur tesem ya kanga tongtibang tesem ka küma anogoshia senzüsemponger ana aser bendang lima nungi arur, ajisüaka chia-jema mapang tatsüka anisüngzüktsü atema kecha makai aliba mapang Dimapur Ao Baptist Arogo ajanga Multi Utility Building ka Impur nung yanglutsüogo aser iba ki

amshia nübor tenzüktsü asoshi July 3, 2023 anogo nung dokan tajung ka lapokogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü. Anungji, tang nungi Impur-i arurtem aser süisüpongertem kecha terata makai anisüngzükba chia jema kazür pei tesem bushia otettsü; iba ya Impur nung alirtem asoshi-a anisüngzük mapa tajung ka asütsü. Iba ya shishilemba tsütsü tajangzük angutsü asoshi dang lapokba masü saka nübor asoshi anisüngzük mapa, ta tangatetba nung inyaker asünung aika asoshi anisüngzük anguba tesem ka südakjang, ta tamang ayur, ta kasa sangdong ajanga lemsatetep.

**AO OSHI ANGAZÜKDAK:**  
**TANÜ ANGAZÜKSÜBA OJANG**



**Remshi**

(v) tenük lapokli shibangli ta arazükba ( blink)

\* Nisung karbo tenük kanga **remshir**.

**Remshilu**

(n) chiyongtsü tanaben mokoteta mejakba (cud)

\* Mosa özüngibo **remshilu** achiba shiruru shi dang achitsü melar.

**OLONG PAITEP # 6565**

1		2			3		4		5
				6		7			
8									
						9			
			10						
11									12
					13			14	
15									
16								17	

**TIPIEN**

- 1. Nüji masü - (4)
- 3. Techniütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

**OLONG PAITEP # 6564 TELANGZÜBA**

**TIPIEN :**


- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.



**SARUSAJI MANENER :**



**Alokba** : Oba asen gate nungji telok ka bakos ammer noktaktepa lir no.

**Tebu** : Parnokji kechi atema arua ahara?

**Alokba** : Swimming pool ka yanglutsü donation aginer akoba.

**Tabu** : Tzü baltin ka züzüka agüjang!

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

**Assam district 6 nung tzümetsüng agi kongshia lir**



**Guwahati, July 3, 2023**

**(Agencies):** Assam nung July 3 nü tzümetsüng nung nisung asüba kecha mali saka district aika nung tzümetsüng timtem tulu ajurua lir.

Taküm tzümetsüng timtem adokba sülen lendong balala nung nisung 7 süogo aser nisung 1539 tashi pei talidak

toktsür tangalen jenoka lir.

Kamrup aser Kokrajhar district nung relief camp ana lapoka lir.

Taküm tzümetsüng ajanga Bajali, Dhemaji, Golaghat, Jorhat, Kamrup aser Kokrajhar district tem nung kanga kongshiogo. Kamrup district nung yimtsüng 83 tashi

tzü agi mobanga lir.

Maneni, Dhubri, Karimganj, Kokrajhar, Nalbari aser Sonitpur district tem nung tari lenmang 14 tashi tzümetsüng agi raksatsüogo saka tzükümlen ali anenzüka aluba lendongbo matalok. Iba jagi flood control maparen tiptema inyakteter.

**CAB ama UCC anema lungkak aittsü: KSU**

**Shillong, July 3, 2023**

**(Agencies):** Meghalaya nung Khasi Students' Union (KSU)-i India sorkar dang Uniform Civil Code (UCC) mapa metenzüktsü atema metetdaksüogo.

Centre-i Northeast region nung lisopurtem indang sobaliba ozüngtem aser inyaksangshi kanga junga shisadanger ang lemtet ka agitsüla ta KSU-i ashi.

Centre-i Northeast nung alirtem sobaliba aser inyaksangshi magizüki dang UCC mapa tenzükra, Citizenship Amendment Bill mapang lungkak aitba ama tensa ajurutsü akok, ta KSU-i

metetdaksü.

"Meghalaya nung lisopurtem indang customary practices lir aser iba nung senmang amangba, balaba, lokti inyakyim aser kiyimba indang dena lir" ta KSU general secretary Donald V Thabah-i ashi.

Khristantem teimba ser aliba state ka asünung Meghalaya nung Christian Marriage Act sülen anidaker, ta paisa ashi.

Uniform Civil Code mapa ajanga item sobaliba inyaksangshi nung kongshitsü ta Thabah-isa ashi.

Arrla 371G ajanga Mizoram aser Arrla 371A ajanga

Nagaland kümzüka ayur saka Meghalaya atemabo iba mesükba arrla mali. Item arrla ajanga Centre özüngtem state tem madak mamshiteter, ta paisa metetdaksü.

Goa nung parnok indang civil code ka lir anungji Centre-i state sorkartem dang uniform code masü saka pei pei civil code yanglutsü ajungmesotsüla, ta Thabah-isa ashi.

State temi pei pei indang civil code yanglutsü tashi agütsüla aser ibaji state shia indang sobaliba aser inyaksangshi nung ajemdaker yanglutsü akok, ta KSU lennirisa ashi.

**Arunachal nung Tawang district hospital-i Kayakalp award angu**

**Itanagar, July 3, 2023**

**(Agencies):** Arunachal Pradesh kübok Tawang district nung aliba Khando Drowa Sangmo Hospital nem Kayakalp district hospital sempet agütsüogo.

Maneni, East Siang district kübok Ruksin nung aliba Community Health Center (CHC)-i best CHC award agizük ta Arunachal Pradesh

health department-i metetdaksü.

Kayakalp Award ya centre sorkari public healthcare facilities nung cleanliness, hygiene aser infection control practices ajungmesotsü atema tenzükba liasü.

Arunachal Pradesh nung district balala nungi primary health centre 12 nem certificates agütsü.

Kayakalp Award nung best district hospital nem Rs 50 lakh, best CHC nem Rs 15 lakh aser best PHC nem Rs 2 lakh senpettem agütsü.

National Health Mission (NHM)-i Deobarnü state-level award sentong ayonga agi.

Iba sentong nung Health & Family Welfare Minister Alo Libang aser tongti ketdangsurtem aden.

**GOVERNMENT OF NAGALAND  
DIRECTORATE OF HIGHER EDUCATION  
NAGALAND: KOHIMA**

NO.HED/HOST/1/2016/

Dated, Kohima, the 30th June 2023

**INFORMATION ON SUBMISSION OF NEW HOSTEL REGISTRATION FORM**

The Directorate of Higher Education, Nagaland, Kohima, hereby issue this information to all who have collected the new Hostel Registration Form from this Office that they can now submit the filled Registration Form along with the required documents as mentioned in the Form to this Office on or before 14th July 2023. The additional document which was verbally communicated earlier to be required at the time of submission of Form would no longer be required.

It is to be noted that in view of the revised guidelines of Post Matric ST Scholarship, all registered hostels under the Directorate of Higher Education will be required to produce "No Objection Certificate" from the Institutions where their hostellers are studying at the time of collecting hostel forms for the hostellers. NOC format is available for download in the Directorate's website <https://highereducation.nagaland.gov.in>.

Sd/-  
**(Dr. A NSHOGA)**  
Director  
Higher Education  
Nagaland: Kohima

# Ukraine-i Russia ket nungi par litsü sq km 37 meyipa agiogo

**Kyiv, Chiteni/July 3 (Agencies):** Ukraine-i Hombarnü ashiba agi, parnoki taoba hopta Russia nunger atsünger aliba tesem balala square kilometres 37 meyipa agiogo.

Anüolien aliba linüktem nungi prangbong injang anguba sülen Kyiv-i hopta ishika tejakdang par litsü meyipa agisü sentong yanglur aliba tenzükba sangdonga liasü.

"Hopta ishika tsüngda linük anütoklen Russia nungeri atsünger aliba ali ano kilometer teku meyipa agiogo," ta Deputy Defence Minister Ganna Malyar-i ashiba den Ukraine

nunger sepaitemi anüolentip nunga ali kilometer 28 meyipa agiogo, ta shisem.

Ukraine nunger sepaitem ya linük anütok aser anüolentip nung Russia nunger kanga junga amenoker aliba tesemtem nung rara arudar.

Malyar-i ashiba agi, Ukraine nunger sepaitem anütoklen Bakhmut temeket nung Russia nungertem den kanga sashia raratepdar.

Anüolentiplen, Ukraine nunger sepaitemi Melitopol aser Berdyansk sector nung takok tulu nguyonga odar.

Ukraine indang military commander-in-chief Valery

Zaluzhny-i Hokolbarnü sensaksem ka nung, anüolien aliba linüktemi nangzükter aliba prangbong injang aser hadirtem kanga meyilongi agütsüba ajanga kanga tezü adangba lemsatapa liasü.

Pai tayimtsü aika menügdaker saka tera dang nügdaker kechiyong tayimtsü medeni tejakdangi aotsü tasak, ta ashi.

Kasa mapang nung Ukraine tir Volodymyr Zelensky-i, Wagner telok anema Vladimir Putin-i kanga tashi meiti jenjang agiogo, aser iba ajanga Russia tir-i par nüburtem mazüokteti akümba sayur, ta ashi.

Zelensky, shiba lenisüba nung Ukraine nunger sepaitemi küm ka dak tema Russia nunger den rara arudar, pai CNN den sensaksem ka nung, Putin-i iba tesem nung joko tensa azioka mali, kechiyong Wagner telok Russia-i meyipaago. Paisa, Russia nunger lenir tashi ajema kümdar, ta ashi.

Taoba ita Russia military lenirtem anema Wagner teloki apusoba mapang nüburtemi parnok pusemba social media sabang balala nung anguogo.

Video ka nung June 24 nü lokti kati Wagner tekolakba

Yevgeny Prigozhin gari ka nung mener Rostov-on-Don toktsür aoba mapang pa pusema yimyim ayimba nguogo.

Zelensky-i ashiba agi, Ukraine nunger itangitertem osang ajanga, Kremlin-i Prigozhin pusemertem asadangogo aser linük tesadang katibo iba telok ya pusemer ta ngutetogo.

Russia yimtiba atongtsü km noklang ishika dang lia Prigozhin lenmang melenshir aoba ajanga Moscow mak asütsü nungi kümzüka liasü.

(Maneni tapak 8 nung...)

## Morok mi mechi Siberia nung state of emergency sangdong

**Sakha, Chiteni/July 03 (Agencies):** Morok mi tali

prokshia aoba mechi Russian Far East nung ketdangsür temi Hombarnü state of emergency sangdongogo.

Yakutia ta ajaba Republic of Sakha indang tekolakbai Telegram messaging app nung zülutsüba agi, ali hectares 61,000 (151,000 acres) shi nung morok mi 110 dak tema adoka lir, koba New York City pezüsü kumer shilem asem shi amai lir.

"Anogo ishika kanga sashia atsükba aser yipru tali tesashiba akum aser iba yongji tensa tali tebenjaba akum," ta Aisen Nikolayev-i zülutsü.

Morok mi remsepba maparen nung nisung 620 aser ground vehicles aser tayimtsü 33 shi densema lir. Tang tashibo nisung alidak timtem agütsüba mali, ta osang ajanga ashi.

Alinük asadangba nung Sakha ya Russia indang region tulutiba lir, aser yangi nütsüng yongsük million ka shi lir.

Taküm Sakha nung firefighting budget asemsü agi timba lir ta Nikolayev-i Tir

Vladimir Putin dang May ita shia liasü.

Siberia nung tzüngsang-mopung kanga tatsükba akumba den tzü-mopung melenba ajanga Russia nung morok mi tali adoker. Parnoki küm shia atmosphere nung carbon aser tzü-mopung menentsüba 'pollutants' tonne million aika yoker.

2021 küm morok mi adokba wa ya Russia asoshi tulutiba liasü aser iba mapang arem 18.8 million hectares (46.5 million acres) rongdok, ta Greenpeace Russia ajanga ashir, koba Ireland asetkong anasü shi alitsü.

North tsütsü Arctic Ocean den arütsüa aliba Sakha nungya tzüngsang-mopung tamajung kanga ajurur. 2021 küm morok mi adokba ajanga emissions records tasen yanglua liasü aser morok mi nungi adokba mokozü ya North Pole tonga liasü, koba puti otsü nung mezüngbuba alitsü.

Taoba küm Siberia nung morok mi agi nisung ter dak tema asü.

**GOVERNMENT OF NAGALAND  
DIRECTORATE OF EMPLOYMENT, SKILL  
DEVELOPMENT & ENTREPRENEURSHIP  
NAGALAND: KOHIMA**

NO.DET-2/14/2001/PT-II/198 Dated Kohima, the 3rd July 2023

**ADVERTISEMENT**

Application in the prescribed form is hereby invited from bonafide local candidates for undergoing training at various Govt. Industrial Training Institutes under Craftsmen Training Scheme for the session 2023-2024/25.

Name of the Institutes, sanctioned trades, duration of courses and minimum Educational qualification required are given below :

**SESSION : 2023 - 2024/25**

Sl. No	Trades	Duration of Course	Minimum Educational Qualification	Seating Capacity	Name of Govt. ITIs	
					*NCVT	*SCVT
<b>A. Engineering Trades</b>						
1.	Wood Work Technician (Carpenter)	1 year	8 <sup>th</sup> Passed	24 each	Kohima, Phek, Wokha, Tuensang.	Kohima, Mon, Kiphire
2.	Plumber	1 year	8 <sup>th</sup> Passed	20 each	-	Kohima, Phek, Zunheboto.
3.	Welder	1 year	8 <sup>th</sup> Passed	20 each	Kohima.	
4.	Mason (Building Constructor)	1 year	8 <sup>th</sup> Passed	20 each	-	Kohima.
5.	Mechanic Diesel	1 year	10 <sup>th</sup> Passed with Maths & Science	24 each	Kohima.	Tuensang
6.	Electrician	2 years	10 <sup>th</sup> Passed with Maths & Science	20 each	Kohima	Mon, Zunheboto
7.	Draughtsman (Civil)	2 years	10 <sup>th</sup> Passed with Maths & Science	24 each	Mokokchung	
8.	Mechanic Motor Vehicle	2 years	10 <sup>th</sup> Passed with Maths & Science	20 each		Mokokchung, Phek
<b>B. Non-Engineering Trades.</b>						
1.	Basic Cosmetology (Hair & Skin Care)	1 year	10 <sup>th</sup> Passed	20 each	-	Kohima, Dimapur, Phek.
2.	Computer Operator & Programming Assistant (COPA)	1 year	10 <sup>th</sup> Passed	24 each	Mokokchung, Zunheboto, Mon,	Kohima, Dimapur, Wokha.
3.	Knitting	1 year	8 <sup>th</sup> Passed	20 each	-	Kohima, Mon.
4.	Sewing Technology (Cutting & Sewing/ Dress Making)	1 year	8 <sup>th</sup> Passed	20 each	Dimapur.	Kohima, Mon, Tuensang, Wokha, PhekKiphire, Zunheboto.
5.	Stenographer Secretarial Assistant	1 year	10 <sup>th</sup> Passed	24 each	-	Dimapur, Mokokchung.

\* **NCVT - National Council for Vocational Training (Under Central Govt.)**  
\* **SCVT - State Council for Vocational Training (Under State Govt.)**

**N.B:**

- Candidates applying for admission must be above 14 (fourteen) years of age as on 1<sup>st</sup> August 2023 and there is no upper age limit.
- Application form is available from respective Govt. ITI on any working day during office hours.
- Seating capacity in Sewing Technology trade at Govt. ITI, Kohima and Stenographer Secretarial Assistant at Govt. W.ITI, Dimapur are 40 (Forty) Nos, and 48 (Forty Eight) nos respectively.
- Cost of application form is **Rs. 50/- (Rupees Fifty) only.**
- Last date of submission of form is **14/07/2023.**
- Date of Entrance test :
  - 19<sup>th</sup> July 2023 – Non Engg. Trades** :- Morning - 10:00 am (under Matric Trades)  
Afternoon - 12:00 pm (Matriculate Trades)
  - 20<sup>th</sup> July 2023 – Engg. Trades** :- Morning - 10:00 am (under Matric Trades)  
Afternoon - 12:00 pm (Matriculate Trades)
- Entrance Test result will be declared on **27<sup>th</sup> of July 2023.**
- Only women candidates need apply for Women ITI, Dimapur.
- Selected candidates will be paid stipend @ **Rs. 500/- PM.**

**Addendum:**

- Combined selection of candidates shall be done on the basis of merit in the written test to be conducted in each ITI as indicated above.**
- No admissions shall be taken up if the number of applicants falls below 10 (ten) for a trade in a specific ITI, however the candidates of such trades shall be adjusted to the seats available in other ITIs in the same discipline.**

Sd/-  
**KOVIMEYASE, NCS**  
Additional Secretary  
& Ex-Officio Director (HoD)

OFFICE OF THE  
**AO SENDEN**  
*"Nubur Asahi" (For the People)*  
Date : 03-07-2023

**SANGDONGER**

Wb. Rongsentoshi Longkumer (Longmisa) Diphubar B, Chumüokedima, pai asenok Ao kini sobuba mangkotepe agi yangluba sümoktsü (waist-coat) mezüng apiteta yangluba nüngmekka temeden Ao Senden ajanga pa nem agütsütsü asoshi kuli dena zülü nung Ao Senden dang asüngdanga zülüa lir.

Anungji iba maparen dak sentakba nung Ao sünak abener kari danga tashishitsü lira iba sangdong adokba anogo nungi tenzükter anogo 30 (semer) tsüngda nung kuli tejangja den zülü nung Ao Senden Office tongtsütsü sangdonger.

Sd/- **(Chubawati Longchar)** President  
Sd/- **(Imtipokym)** Gen. Secretary

In the Court of  
**Principal District & Sessions Judge**  
Mokokchung: Nagaland  
S/C NO. 89/2023

**NOTICE**

**NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925**

Whereas application under Succession Act 1925 for grant of Succession Certificate for the estate/pension benefits of Late T.Chubatemsü Jamir, has been applied by Smti. Lolentola W/o Lt. T. Chubatemsü Jamir R/o H.No. 582 School Compound, Chuchuyimpang Village, Mokokchung, Nagaland for possession of :

GPF, GIS, Leave encashment, Gravity, Change of ownership consumer No. 7063557385 M/S Rose Indane service.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 03.08.2023.

Given under the hand and seal of the court on this the 03.07.2023

Sd/-  
**Principal District & Sessions Judge**  
Mokokchung: Nagaland

## Chhetri aser Bengaluru FC na tenangzüktepba yanglushiogo

**Chiteni/July 3, 2023 (Agencies):** Taruba Indian Super League (ISL) 2023-24 season metenzük tsüingda India football team captain Sunil Chhetri-i, Bengaluru FC den küm ka atema tenangzüktepba yanglushiogo. Chhetri shiba ita ana dang lir arishi küm 39 ajungtsü lir pai iba club den tenangzüktepba yanglushiogo.

Tenangzüktepba yangluba nung ano küm ka atsülangtsü atema lenmang sadema lapoka yuogo aser iba ajanga pa 2025 küm tashi club nungi asayatsü. Chhetri ya India nung football asaya nung maneni kanga dang tongtibang asayar ka lir aser pa lenisüba nung India team tawa

sayaba FIFA ranking nung 100bubai tuogo.

SAFF Championship 2023 semifinal nung Lebanon penalty nung goal 4-2 agi akokba sülen Bengaluru kübok Kanteerava Stadium nung banner ka sayaba mapang Chhetri-i pa maneni Bengaluru nungi asayatsü teletetba agiba sangdonga liasü.

"Ni Bengaluru FC den tenangzüktepba ishiebenbo yangluogo aser tenangzüktepba yangluba shia ya jangrademtsüka lir. Ni iba club nungi ano küm ana asayatsü maongka anguba atema kanga pelar," ta Chhetri-i ashi, shiba iba club nungi takok marok 7 koktetogo.

India nung asayar tejen ya 2013 küm mezüing Bengaluru nung aden aser iba sülen pa club nung küm ter asayaogo. Pa iba club nung asayar tejentiba lir.

BFC nungi asayaba mapang Sunil-i, 2014 aser 2016 küm I League kokogo. Paisa, 2015 aser 2017 kübok Federation Cup kokogo aser iba sülen 2018 küm Super Cup koka liasü. Bengaluru-isa, 2019 küm ISL title benogo aser 2022 küm Durand Cup akokba den ISL final tonga asayaogo.

Pai tang tashi nung iba club nungi 250 ben asaya lir aser iba mapang goal 116 idaktsüogo. Pa season tenet tashi club nungi goal timtiba asayar liasü.

## Liverpool-i euro million 70 agi Dominik Szoboszlai alizükogo



**Liverpool, Chiteni/July 3 (Agencies):** Liverpool-i RB Leipzig nungi Dominik Szoboszlai alizükba sangdongogo. Hungary nung asayar atema release clause euro million 70 agütsüba sülen pa alizükogo.

Taoba ita Argentine nung asayar Alexis Mac Allister alizükba sülen tang arishi küm 22 tain asayar ya alizükogo aser iba ajanga Liverpool pur midfield nung tashi itdaktsütsü.

"Taoba anogo asem pezüka kanga talang liasü aser temela masü asü. Ajisüaka tatem nung ni idaki lir aser ni kanga pelar aser asaya tenzüktsü matateter," ta Szoboszlai-i ashi.

"Liverpool ya kanga dang historic club ka aser iba club nung asayar aser coach tajung lir. Kü atema iba amala club nung taruba jenjang agütsüji tetemsü lir. Fan tem aser stadium-a kanga tajung lir," ta pai ashi.

Taoba season jenjang pongububa nung tembanga küm tenet tsüingda tang mezüingbuba Champions League atema qualify masüba sülen Liverpool pur midfield akangshitsü atema inyaktepa liasü.

Season tatemi contract

tembangba sülen midfielders James Milner, Alex Oxlade-Chamberlain aser Naby Keita nung aser ajaki club toktsüogo.

Club nung Szoboszlai-i, Keita-i sema aliba jersey number 8 asemtsü aser lanuwa pai kanga sakloka aliba asayar Steven Gerrard tsüingsü nung anidaktsü.

2021 küm January ita Leipzig nung adenba sülen Szoboszlai-i, asaya 91 nung goal 20 idaktsü aser assist 22 süja liasü aser iba den German Cup akokba aser par team taoba season ana Bundesliga nung top four nung tembangba nung teyari agüja liasü.

Christopher Nkunku Chelsea-i aoba sülen Leipzig nungi asayatem rongnungi sen aikati alizüka Premier League-i aoba asayatem rongnung Szoboszlai tanabuba asayar kümogo.

Kasa mapang nung ano Manchester City-i Leipzig centre-back Josko Gvardiol alizüktsü asoshi jembishinüdar aser pa-a sen aikayong alizüktsü imlar. Sensaksem asadanga Croatia nung asayar ya defender tem rongnung sen timtiba agi alizükba asayar akümtsü imlar.

## Sindhu aser Sen nati anir Canada Open asayatsü

**New Delhi, Chiteni/July 3 (Agencies):** Mongolbarnü nungi tenzükba Calgary nung Canada Open World Tour Super 500 tournament asayaba mapang India nung rongnungi nüngtugu badminton asayar PV Sindhu aser Lakshya Sen nati kanga dang tongtibang ranking points angütsü merangtsü.

Sindhu yiruba sülen tang junga masayateti arudar aser la tetsür kija asaya nung jenjang 12bubai asepzüka luogo. Taoba world champion aser Olympics nung medal ana tashi ngur alila ya tang tashi temang kanga junga taneptsü mongui lir.

Taoba asayamung ishika nung junga masayateti aruba sülen arishi küm 27 tain asayar ya tang Paris Olympics atema qualification asaya aliba tanungba asayamungtem nung junga asayatsüsa akümtsü. Qualification ya May 1, 2023 nungi April 28, 2024 tashi asayatsü.

Sindhu shiba taoba küm Birmingham nung Commonwealth Games nung

gold medal anguba sülen yirua liasü, la February ita Badminton Asia Mixed Team Championships nung bronze medal anguba India team nung densema liasü, saka pa taküm World Tour events kar nung shilem magiteti liasü.

Lai taküm tajungtiba asayabji Madrid Masters Super 300 event nung silver medal anguba ya asütsü. Iba sülen la asayamung aika nung mezüingbuba aser tanabuba round nung tsükogo.

Iba asayamung nung Sindhu mezüingbuba asaya Talia NG den asayatsü aser asaya kokyonga tura la quarterfinal nung Japan tsür Nozomi Okahara den asayatsü akok.

Kasa mapang nung Commonwealth Games champion Lakshya Sen-a taküm asayamung ishika nung mezüingbuba round nung tsükatokba sülen top-10 nungi tuguogo. Pai January ita Indonesia Masters nung dang quarter-finals tonga asayaogo.

Taoba küm August ita World

Championships asayaba sülen Sen teni surgery agi aser iba sülen ita ti shi temang nung aiben timtema arudar.

"Ni temang taneptsü junga monguteti lir. Ni training agiba mapang yirur mesüra shirangatoker. Ibayongji ni atzüngzüktsüsa aküm kechiyong mezüingbuba ita ka anabo ni temang kanga majung ta memeteti liasü. Ni asayaba yimya aika melenshiogo aser meranga training agidar," ta pai ashi.

Sen iba asayamung nung mezüingbuba asaya second seed asayar Kunlavut Vitidsarn den asayatsü.

Kasa asayamung tebur tarep asaya nung Krishna Prasad Garaga aser Vishnuvardhan Panjala na asayatsü. Tena mezüingbuba asaya France nung tarep Julien Maio aser William Villeger na den asayatsü.

India nung tarep ya taoba ita Taipei Open Super 300 asayamung nung mezüingbuba round nung tsüka liasü.

## Nathan Lyon yiruba ajanga Ashes nung masayatetsü

**New Delhi, Chiteni/July 3 (Agencies):** Australia nung spinner Nathan Lyon tetsüing tachichilen temola yiruba sülen Ashes asayamung nung tanungba asayatem nung shilem magitettsü.

Arishi küm 36 tain spinner shiba Australia tenüing nungi Test asaya 100buba atonga asayaba benjunga liasü, pa tanabuba test nung tanabuba anogo fielding amenba mapang yirua liasü.

Iba asaya ya Australia-i run 43 agi akok aser Test pongu asayatsü aliba nung parnoki 2-0 ta tejakdang lir.

Yiruba sülen Lyon bowling-a masü aser fielding nunga shilem magi. Ajisüaka pa Australia pur tanabuba innings nung aloka aiter batting amen aser kanga dang tongtibang run 15 yanglua liasü.

Lyon masayatetsüsa

akümba sülen tasembuba test nung pa melena off-spinner Todd Murphy asayatsü imlar, kechiyong Cricket Australia-i pa melener shimba sangdonga mali.

Arishi küm 22 tain Murphy, shibai tang tashi nung first-class 12 dang asayar lir pai taküm India nung mezüingbuba Test asayaba mapang pa dak sempet tajung keta aliba sayuogo. Pai Test asaya pezü nung wicket 14 agia liasü. Pai Nagpur nung asayaba mapang kanga junga asayaogo aser pai run 124 agütsür wicket 7 agia liasü. Iba asayamung nung Murphy-i, Virat Kohli pezüben tashi out süja liasü.

Ajisüaka pa tang mezüingbuba Test asaya ka nung spinner rongnungi pa kija asayatsü lir.

"Pa (Murphy) idang stock ball ya international cricket

atema tajung lir. Onoki pa India nung asayaba nguogo, kong spin aontsü atema kanga tasak lir," ta Lyon-i ashi.

"England nung batter tem dang ball aotsü balaka lir. Parnoki pai aonba ball azüktsü meranga Todd asoshi wicket agütsü maongka lir. Iba ya Ashes series lir aser iba maongka anguba atema pa kanga pelar," ta pai shisem.

Ashes nung tasembuba Test ya Brehostibarnü nungi Headingley nung asayatsü aser 2013 küm Lord's nung asaya tenzükba sülen Lyon tang mezüingbuba Test asaya ka nung shilem magütsü.

"Ni tia ka-a meyirui asayaogo. 2011 küm August ita nungi asayar aser onok Test asaya 126 asayaogo aser ni item Test asaya tem rongnungi 122 nung asayaogo," ta Lyon-i ashi.

## Ukraine-i Russia ket... (Tapak 7 nungi...)

Iba tatalokba sülen anogo ishika lir video ka ajanga Wagner tekolakba yagi, parnoki Russia nung lenirtem atsüngtoktsü merangba masü ta shia liasü.

Wagner teloki military lenirtem anema apusoba ajanga Putin lenisüba aser pai Russia inyakyim aziökba yimya ashishi tenzük.

Hombarnü Kremlin-i ashiba agi, intelligence services densema sorkar agency tem ajak parnok koma inyaksangshitsü tim yamaji inyaksangshidar, ta ashi.

Intelligence agency-i kodaser Wagner teloki sorkar anema mapuso tsüingda

meputet ta asüngdangba mapang Kremlin otongdar Dmitry Peskov-i kecha telangzüba magütsü liasü.

Russia-i atsünger aliba tesemtem meyipa agütsü atema Ukraine-i tanem tanemi inyaksangshia aliba mapang ka nung tang Zelensky-i iba olen lemsatopogo.

Tawa Central Intelligence Agency (CIA) tekolakba Bill Burns-i Kyiv semdang aser Ukraine tir aser intelligence ketdangsurtem den ajurutepa liasü.

Ajisüaka Zelensky-i ashiba agi, CIA tekolakba den sensak asemba ya yimjak nung masütsüla.

## BILEMDANGANG

"Tesüiba anogotem indang bilema kazüdang tanü anogo telalu."